

宋朝大詔令集

宋朝大詔令集卷第六十

宰相十

遷官加恩別使二

向敏中進官制

天禧元年八月壬申

上法台耀式崇宰司所以刑四方之風敏百官之職永懷眷獎屬在
老成揆茲靈辰錫以徽數開府儀同三司行中書侍郎兼吏部尚書
同中書門下平章事充景靈官使集賢殿大學士上柱國河內郡開
國公向敏中應期良佐命世宏材綿厯兩朝踐揚二府蘊哲明之德
式是民瞻告良顯之謀亮於邦采協贊斯久燮諧實多方功倚毗久
宜崇進升峻資於右揆兼榮秩於東臺監總信書陪增多邑冠於鼎
席咨乃棟臣益懋嘉庸輔宣至化可尚書右僕射兼門下侍郎同中
書門下平章事監修國史加食邑食實封如故

丁謂進司徒兼侍中制

乾興二年十一月

門下王者丕承寶業總攬懿經必資同德之賢式贊代工之治眷惟
元宰早佐先朝屬綴衣之在庭奉眇躬而集緒上遵於遺旨下副於
羣心克竭明誠茂宣忠力敢緩報功之典幸隆加等之思申錫命書
告于列辟推忠協謀佐理功臣金紫光祿大夫守司空兼門下侍郎
太子少師同中書門下平章事充玉清昭應宮使昭文館大學士監
修國史上柱國晉國公食邑七千七百戶食實封二千八百戶丁謂
星辰異秉公輔宏材執德不回蹈禮居正精誠可以斷大事懿文可
以潤鴻猷惟聖考之知臣列台司而論道嘉言罔伏盡獻替之宜故
事奉行叶簡易之理矧復領師傅之重訓寡昧之姿善誘居多蒙益
滋甚方勉親於庶務宜首舉於徽章是用進地官之崇名升左相之
貴位加其階級增以戶封於戲才大者任業勲高者賞重斯為美制

允叶至公往惟欽哉永輔休運可特授開府儀同三司守司徒兼侍
中依前充玉清昭應宮使昭文館大學士監修國史晉國公加食邑
一千戶食實封四百戶功臣勲封如故仍令所司擇日備禮冊命主
者施行

授司空兼侍中制 同前

門下古之紹皇圖立民極者必有柱石之佐以翊邦家之隆況予冲
人夙荷丕訓自膺儲兩之重即奉賓師之賢日聞茂規動有成範迫
茲績服敢忘報功乃擇副辰告于羣辟推恩協謀同德依理功臣開
府儀同三司行尚書左僕射兼中書侍郎太子少傅同中書門下平
章事充景靈宮使集賢殿大學士上柱國魏國公食邑七千七百戶
食實封二千八百戶馮拯道冠先覺器涵元和潛識究於幾神敏行
臻乎律度弼亮文考勤勞王家研百慮以求中講四維而端本兩府

之劇交修於善絃兆民所瞻克揚於洪化觀靈臺之載刃從喬岫之
繩金明略有融昌期允協洎先帝勤思妙道願養大廷乃眷眇躬俾
參庶務實以三槐之傑兼千六傳之崇內則陟降延英盡彌綸之業
外則雍容博望極箴誨之宜協比窠察靖恭夙夜辨珎琳於大烈識
松柏於歲寒訖當仍几之辰咸受綴衣之命輔予翼室襲此鴻基昭
順變之禮容渙維新之號令萬邦允哲丕績茂焉是用俯叶僉同傳
詢典制秩優平土位進納言時食賦之增封賜銘勲之美號聿宗廉
級上應階符於戲三聖垂休二儀儲貺編此品物懷禹德以寢淵列
位羣司仰蒲規而克一嘉興元老勤思永圖克宣至仁以潤天下可
特授守司空兼侍中依前充景靈宮使集賢殿大學士魏國公如食
邑一千戶食實封四百戶仍賜推忠協謀同德守正佐理功臣散官
勲如故仍令所司擇日備禮冊命主者施行

馮拯加恩制 十月二十七日

門下賞功褒德有國之大猷送往事居為臣之亮節其有位隆台衮
望重搢紳綬帷展之許謨奉寢園之異制竭誠匪懈率禮無違遽上
封章願辭大任宜降疇庸之命且旌崇讓之風具官馮拯道業淵冲
性質嚴重言惟有信動不違仁遠事先朝荐升宰府彌綸事典克堅
夙夜之心亮采邦家靡渝金石之操洎冲人之纂緒道末命以揚廷
中外晏然繫乃之力一昨因山展禮同執戒期實摠使權聿終襄事
永念匪躬之效敢忘進律之文美號褒功俾增於異數永田食采吏
益於真封於戲當萬邦咸乂之辰乃百度惟新之始咨爾元老澄其
嘉猷永輔昌期同底於道可特授依前守司徒兼侍中充玉清昭應
宮使昭文館大學士監修國史魏國公加食邑一千戶食實封四百
戶仍賜推忠協謀同德守正保節佐理功臣散官勳封如故主者施

行

杜衍加恩制 慶曆四年十一月南郊

門下朕祗飭齊輅躬款泰壇昭事天明交修地祇侑升二后賓筵萬
靈昭鑒次於都畿欽柴燎於霄極越惟雋輔相我盛容方錄解嚴之
勤時先醲假之懿用信賞典以告治朝具官杜衍清明以和練達而
敏有罔伏之亮奮於知思有含章之美發於事業向圖元祀之筵允
賴若時之庸假節大廷告謚慈祐奉瑤冊而虔聲秘金鎮之遽嚴而
又率籲迨司奉行故典牲牷肥腍玉粢精純接神明以歡馨塞穹壤
而凝祐遂頒大慶胥洽衆歡永言睹髮之良欽從屬車之至職勞而
賞惟敏則功宜增號表之榮仍崇階等之貴廣開厥邑優實乃祖於
戲靈眷備成恩章差沛所期君臣有以相戒休恤有以無疆熙其未
明開其未睹俾乂予治聿臻爾猷可

釋琦依前工部尚書同中書門下平章事集賢殿大學士加
恩制 嘉祐四年給事

門下春秋大事載合食之文建武舊儀有親祠之典朕永追來孝邈
企前徽因時物成考古禘祭具法物之駕歆神祖之廷儀采焜煌牲
玉純潔殊方底貢羣岳入陪誠志孚通聖靈開饗通成熙事誕賦祥
應翼我盛容時惟茂孝爰瞻爾嘗式告于朝具官某秉志忠純蹈道
夷正居然時儼之望司我大政之均有惟深之明以通於衆志有成
德之美以弼予朕躬而自奉高失謨先庚乎號總乃容臺之議協于
齋殿之恭率籲羣工拱侍裸獻明發不寐朕深惕然之思暇假無言
爾有禺然之色自爵酒之云盥訖丹燎之既升率履弗違右饗如答
至陽顯見積晦開消還御端門飲至太寢益以褒功之號拓茲衍食
之封寶賦有加異數斯在於戲相予肆祀既格于休嘉勉爾亮工益

思於輔拂時惟良顯往其懋哉

韓琦授依前同中書門下平章事進封儀國公加食邑實封
制宋祀嘉祐七年

門下朕按奉高之儀思承上帝之福詠我將之什知配文王之功
淑辰季秋之良盡志孝饗之事應一郊之定卜躬三歲之宗祈于
時陳物采于國中接神明于堂上璧玉溫潔粢盛令芳聖光燭於
大廷休氣蒙于重宇時相丕祀於顯元臣肆膺拜胙之釐首布告
廷之命具官某命世發德佐王矢謀財萬化於物宜熙百工於帝
載已任沈機之斷力陳遠馭之圖若歲為霖可以濟天下之旱如
易占莢可以判天下之疑責大而智愈深事昭而精猶勉廼先
庚之詔靡物備而不然雖自昔之文或禮濶而不講使朕得口
六天之對款七廟之靈輯于昭曠之儀碩匪烈文之輔茲庸錫
之名壤建爾土公寔廣奉田之

腹復敦真食之賦汝為汝聽汝勞汝嘉於戲在福不敗康蓋天有難
忱之命於德如不及蓋民無常懷之心雖朝廷之甚休益君臣之相
勅宜興盛治允荅靈歌可

宋朝天詔令集第卷十

宋朝大詔令集卷第六十一

宰相十一

進官加恩別使三

韓琦受門下侍郎兼兵部尚書依前同中書門下平章事進

封衛國公加食邑實封制

嘉祐八年四月十二日

門下王者紹景運之序履皇極之尊永惟置器之難屬在佐王之路
瞻夫上宰翼我先朝適及委裘之辰肆予奉鬯之始決策宗社貫心
神明逮躬丕務之咨敢後元勳之獎首敷邦渙誕告朝倫具官某器
博而適時道閑而濟民稟星辰之精粹會日月之休明厯宣外勞更
倚二柄蹈夷險之一節寄安危之大機仰文考之知賢選時髦而登
用維召公之托嘗聞顧命之言維漢相之謀終應大橫之兆蓋懷先
見者識之遠決至慮者材之英天扶不拔之基神贊非常之輔是用

進文昌之卿序正黃閣之台符隆以封爵之文益之戶田之賦以蕃
爾數以懋爾庸於戲天視靡私居飭有邦之畏民心曷戴一歸厥后
之仁念先猷之弗敢康願成業之不可恃益經茂烈用佐昌圖可

曾公亮特進兼禮部尚書加恩制嘉祐八年

門下自昔純體守文之君承祧踐祚之始必賴輔弼共寧邦家況予
沖人惟德不類仰惟托付之重俯念奉稱之難方倚謀猷以隆政道
推忠協謀同德佐理功臣光祿大夫行尚書吏部侍郎同中書門下
平章事集賢殿大學士上柱國廬陵郡開國公食邑五千一百戶食
實封一千四百戶曾公亮履道沖素秉德溫恭才適世務之周器包
王佐之略而自輔佐先帝幹翼本朝遠圖是經大事能斷中外咸以
社稷以安逮於憑几之辰矧在受遺之列共推眇質獲纂慶基任莫
重焉禮無違者稽舊章之順變孚大號以維新報德褒功於是乎在

紫微右掖貳卿居獻替之崇文昌中臺八座司出納之命衍加真食
增益戶封仍峻崇階併隆寵數於戲我國家四聖相繼百年于茲思
德結於民心教教衍乎方表築典章而具在願持守以維艱嘉與忠
賢奉若成憲守而勿失永孚于休可

韓琦進右僕射制

治平元年閏
五月戊辰

無德不報者古人之甚重有功而賞者當國之所先況乎輔弼之良
嘗任社稷之寄豈無異數於昭大猷推忠協謀同德守正佐理功臣
開府儀同三司行門下侍郎兼兵部尚書同中書門下平章事昭文
館大學士監修國史兼譯經潤文使上柱國衛國公食邑九千七百
戶食實封三千四百戶韓琦天資惇絕世濟英敏擢自先帝付于沖
人藩卽側微首與建儲之義宮車出駕復推定策之忠尋屬過哀之
所傷在於機務而咸發乃能勵一德以無懈底庶工之允修逮茲平

康是用嘉歎進升右相兼領東臺重啟多封益陪真賦於戲書載伊尹勲格于天史稱霍光義形于主今朕所得宜無愧焉可特授行尚書右僕射兼門下侍郎同中書門下平章事昭文館大學士監修國史兼譯經潤文使衛國公加食邑一千戶食實封四百戶

曾公亮進戶部尚書制同前

在昔公旦之輔成王子孟之立昭帝皆承統緒之正且無疾疚之憂而其史冊之所傳有丹青之不泯碩予賢弼克迪賢良推忠協謀同德佐理功臣特進行中書侍郎兼禮部尚書同中書門下平章事集賢殿大學士上柱國廬陵郡開國公食邑六千一百戶食實封一千八百戶曾公亮才猷靖深性資端雅能任經術以斷國論大意與子預定大謀上心察臣令受遺詔重惟嗣位之始加以積哀之傷中外事為罔或不濟惟德之報此焉其期是用仍西省之秘嚴兼地官

之長率陪教多邑增衍爰田於戲社稷之功與古無愧廊廟之器惟
時所瞻勉祇寵休以副朕意可特受依前行中書侍郎兼戶部尚書
門下平章事集賢殿大學士上柱國加食邑一千戶食實封四百戶
韓琦受依前同中書門下平章事進封魏國公加食邑實封
功臣制治平二年郊

門下朕考成命之頌以報天地之仁奏興安之歌以詠祖考之德維
僚升而至精薦維禋行而至孝通顧國事之大不敢康本神惠之至
不敢愛矧予秉德之輔固有相祠之勞宜蠲嘉辰首告列位具官某
篤亮純正靖莊簡夷辭氣涵和社稷之計已定誠明乎達陰陽之變
已調追言聖考之知肆及沖人之造屬肇躬於元祀實總使於先期
鍾石在廷而譯諧遽簋在席而嘉潔感靈觀之右谷底熙典之備成
上功太常既為一代之寵析土全魏又繼前人之休廣爰田之載腴

陪真賦之載厚蕃庸爾敷庸暢爾猷於戲上下合法日格群釐之既
左右同體益圖永世之寧往服茂章聿綏純履可

曾公亮除門下侍郎兼吏部尚書依前同中書門下平章事
進封英國公加食邑食實封功臣制

治平四年

門下大火基宋實開五聖之符六龍乘乾遂繼中天之運乃勝近弼
荐更三朝元勲冠於百僚利澤施於萬世載涓穀旦敷告治廷具官
某學通天地之微謀合聖賢之舉包剛柔於九德固夷險之一心蚤
膺皇祖之求爰復公台之位有臯夔之論能變堯民於時雍有丙魏
之聲不改漢家之故事肆我文考遺予冲人咨顧命之老臣輔初政
於天下重宣至策終仰丕成進百中臺之班往導東省之務既䟽榮
於公社益隙數於爰田功之所加寵不敢後於戲恐德弗類念高宗
之末言俾民不迷繫尹氏之素力共祇天鑒永佑邦休可

曾公亮進左僕射封充國公加恩制治平四年九月壬寅

上天之緯運四時不能以全功睿主之謀統群物不能以獨化矧予
眇德之御方攬萬機之難寶仰成於輔臣以經起於邦治爰旌丕烈
庸告群倫推忠協謀同德守正亮節佐理功臣開府儀同三司門下
侍郎兼吏部尚書同中書門下平章事集賢殿大學士上柱國英國
公食邑九千一百戶食實封三千戶曾公亮明允篤誠溫恭迪啟動
合聖賢之檢言形社稷之忠蚤邁聖期遂宜台路子孟之承宣帝預
定於大謀召公之保三朝率躬於一德乃眷積勤之舊未昭報禮之
隆其繼揆於中臺益侈封於大國加以爰田之類陪之真戶之輸誕
惟寵章優我茂宰於戲王命山甫恣是百辟之瞻天錫魯侯祚爾千
齡之福更恢遠略永弼昌圖可特授行尚書左僕射依前兼門下侍
郎同中書門下平章事集賢殿大學士進封充國公加食邑一千戶

食實封四百戶

曾公亮授依前同中書門下平章事進封魯國公加食邑實封功臣制熙寧二年

門下夫物生本夫天人道始於祖故有天下不可不嚴大報為人子不可不懷孝思朕肇禋紫壇光薦清廟誕舉合祛之事道駿定配之彞繼資顯相之臣有若元勳之考宜先烈位以渙丕謨其官某躬咸德之良履上宰之任運理群物人厚衣食之原填撫四夷時無兵革之氣乃候景初至因丘自園始朕既執祿玉以見宗祖又將滌性幣以事天地而上下莫不有嘉德內外莫不有歡心高靈鑒觀休應顯見茲庸加爾以太常之功號錫爾以東魯之大邦而復益以爰田衍之真賦並躡寵名之異以彰賢業之隆於戲考越縉之文知尊祀之不敢廢修歸賑之禮頌神惠之不敢專往承天休更起予治可

王安石進左僕射制

熙寧八年六月
辛亥三祚義成

周公之制禮樂位斯貴於一時孔子之刪詩書道蓋尊於萬世惟三
經之甚奧曠千載以難明若若宗師爰建義訓果成編於至當足貽
惠於將來恭詳竄定之勞並需選官之賞唱導主張之任宜加異數
之文屬茲良辰告迺庶位推忠協謀同德佐理功臣特進行吏部尚
書同中書門下平章事昭文館大學士兼譯經潤文使上柱國太原
郡開國公食邑五千六百戶食實封一千六百戶王安石識貫古今
術該聖賢服仁義以維其功仗公忠而奮其節覺斯民也任同伊尹
之心如蒼生何居起謝安之志入蒿當世之務聞至治於無窮出納
聖人之書彰微言於不朽實舊說之難到正先儒之本安理既炳于
丹青義可刊于金石覽觀具悉開發洪多是用升左揆之榮班兼東
臺之要職仍陪封邑併示褒恩於戲斥乎異端功已齊於荀孟見於

行事名當邁於臯夔往懋訂謨輔成美化可特授尚書左僕射兼門
下侍郎同中書門下平章事昭文館大學士兼譯經潤文使加食邑
一千戶食實封四百戶

宋朝大詔令集卷第六十二

宰相十二

進官加恩別使四

王珪換銀青光祿大夫兼門下侍郎依前平章事監修國史
制元豐三年九月

門下朕稽若古訓肇新庶官必也正名率由道揆因以制祿庶無食浮
粍惟宰制之司首被甄升之命誕揚渙號播告治朝尚書禮部侍郎
同中書門下平章事集賢殿大學士王珪直恭惠和敦大簡重富有
賢業蔚為名臣選綜譽髦擢秉機務夙夜匪懈毀譽不回納忠告猷
有謨明弼諧之効揆策圖事得消萌禦侮之謀歷選是從具瞻惟允
進西臺之要地兼右相之崇資若時茂恩屬我良弼於戲循明責實
庶圖保乂之勲終體贊元允賴惠疇之輔往踐厥位永孚于休可特

授銀青光祿大夫兼門下侍郎依前平章事監修國史勳封食邑如故主者施行

王珪加恩制

元豐五年
兩朝史成

朕誕膺駿命恭紹慶基永惟仁祖之享邦暨我英皇之垂統惟神功莫得而紀念後嗣其何以觀寤寐興懷逸遺是惧董成丕典時倚宗工稽訂故常峻躋位序誕孚渙號申告治朝具官某望具師瞻寄隆邦揆克勤小物夙績事為之勞多識前言雅長體要之事於皇二后之美對越百王之休後先相望今古絕擬而文謨武烈尚故牒之弗倫義士忠臣或幽光之未發首咨鴻博三屬雋髦採撫殘編網羅隱德品章甫就齊被再觀旁貫異聞固多金匱之舊昭示來世不愧名山之藏上足慰往聖貽謀之心俯以成眇躬繼志之善忠嘉所止欽歎弗忘肆舉褒章進崇寵秩及貳中臺之劇肇開西土之封併厚恩私

式殊體貌於戲禮攝達孝益能述事以圖終史重良才謂匪耀文而失實燦然絕迹者在新書豈特朕獲伸罔極之恩亦惟爾與有無窮之聞尚期交飭勿替前修

王珪加恩制 元豐六年郊

門下朕以方隆底定年穀屢豐迺承景至之辰躬脩郊見之禮歸中壇之承宇以逆三神之塵啟南端之特闈大均四海之澤眷于上宰褒進寵章某清明而沖醇和裕而宏毅嚴廊敷論贊元經體者歷年華省正名亮采惠疇者一節屬舉肇禮之典顯相鉅儀之修樂奏而神意娛禮行而天休至百工莫不有嘉德四海罔不格歡心是用錫爾以成國之封衍爾以土腴之賦以圖丕績以蕃寵名於戲惟神祇祖考之安迺膺於介福惟耳目股肱之翼迺底於丕平往承之休益茂爾烈

蔡確加恩制 元豐六年郊

門下朕通追僖章肇稱吉禮禋嘗清廟所以儀前人之休升禋紫壇所以拜上帝之貺咨訪儒術包舉藝文孝奏而精意昭靈游而真符下眷言右弼宜霑微恩某材敏而慮明品博而用遠秉鈞宰路緝群物以興和貳令中臺帥六卿而倡治屬躬修於元祀實顯相於上儀樂變而神光游禮行而乾端露百辟雍肅萬方嘉娛維介福之來同首炳臣而加錫陪敦多邑申衍本封以協榮懷以昭勵翼於戲專饗獨美其福豈朕之心同寅協恭于表時汝之任往承渥命益起茂功

左相王珪進金戴光祿大夫封岐國公制 元豐八年

門下朕卿荷燕謀奉承大庥繼猶泮渙永惟器寶之安宏濟艱難實賴辰猷之告曠夫上宰翊我寧朝利澤昭于四方元功冠於百辟肆頒顯冊敷告治廷某學蹈高明之方辭兼麗雅之訓敷文西掖早膺

文祖之知持橐北門沒被厚陵之遇越事皇考遂持政鈞士多新美之才時無兵革之氣屬紹休於皇緒預定議於禁塗傳說之總百官倚倚之輔德畢公之弼四世惟以仰成是用進以崇階錫以名國陪教多并增衍真封以協榮懷以隆體貌於戲儲思恭默念高宗之宅憂秉德柔嘉賴獎侯之賦命往承茂渥永底丕平

蔡確進通議大夫制 元豐八年

門下朕蒙休烈聖錫羨我家承明繼成悞未堪於多難贊元經體思圖任於舊人迺眷炳臣久儀宰路協籌謀於一德挈法度於四方褒序元功賜頒顯冊某智崇而慮遠器博而用通包深厚之訓辭蹈高明之善學服采禁途之近特為宣帝之知總厥百官進貳中臺之令間於兩社首持黃闥之均外緝三陳內遂百物及處受遺之列尤嘉定議之功安勸庶邦有若召公之老可屬大事莫如周勃之忠是用

進以崇階陪之多升以昭勝倚以協榮懷於戲欽若聖神之謨新美政事之序其風采號令足以震懾於四裔其典章文物足以維持於億年嘉興志賢共脩大治覲成前烈永成丕平

左相蔡確轉正議大夫加恩制

元豐八年加十二月辛未山陵祔廟

門下王者優禮輔相所以念守成之難褒賞勲勞所以昭礪世之法迺眷上宰典領庶工扈從裕陵之行奉承清廟之祔託我大事合於陟文宜布明綸以詔群辟通議大夫守尚書左僕射兼門下侍郎上柱國清源郡開國公食邑五千二百戶食實封二千二百戶蔡確方嚴而教裕敏達而粹醇貫通萬物之微馳聘六藝之學被遇文考早踐鈞衡之崇陪輔沖人首聞龜鼎之託方茲法政之始尤致調元之忠倡帥百寮嘉靖四國適屬因山典禮同軌戒期出總使聯協襄祀言事念匪功之節申頒進律之章錫以爰田陪之真戶以蕃異數以

國茂功於戲丙魏之弼漢廷推同心而輔於政房杜之相唐室歛衆
美而効之君往迪壯猷用結前烈可正議大夫加食邑七百度食實
封三百戶餘如故主者施行

右相韓縝轉正議大夫加恩制

同上
山陵祔廟畢

門下朕欽曆駿命獲紹寶圖卜方中之陵不敢忘堯凡之訓祔顧成
之廟蓋以合尚親之文斟酌百王之撫昭明萬世之序迺眷近邇茲
有茂功宜頒顯冊之章播告路朝之聽通議大夫守尚書右僕射兼
中書侍郎上柱國廣陵郡開國公韓縝器宇甚重材資幼通輔我朝
猷肖于世美逮事文考已冠機廷之崇協德眇躬預聞翼室之託越
躋揆路益勤王家寬裕四方總脩衆職屬以裕陵復土拓室升神載
時定策之忠申錫進階之寵陪教邑賦開衍井腴以厚龍光以昭注
倚於戲父子之聞國政已紹緇衣之宜兄弟之獎神階時若棟華之

盛蓋遇之厚則報必稱任之重則責益隆往茂爾猷用若予采可正
議大夫加食邑七百戶食實封三百戶

文彥博加恩制 元祐元年明堂

門下朕倣先王之文嚴宗社之制我將我享躬荐進於三牲有壬有
林助緝熙於百禮將事而乾瑞露荐莖而神意娛感格純休盼敷大
澤興言耆德宜霽徽章某執時機銜翊朕祖考留侯智勇進為王者
之師裴度功名顯平天下之事威望聞於四裔寵遇冠乎一時厲消
路寢之嚴追倣合宮之祀奉承五室雖不陪執玉之班總齊百官蓋
有賴秉鈞之老頒敷邦渙肆衍井腴於戲得萬國之歡心未足明於
美寵報四朝之全德庶有輔於丕平蓋茂壯猷往宣至化

呂公著加恩制 元祐元年明堂

門下王者制行以合禮昭孝以馭神園丘之祀則事之以天道明堂

之享則接之以人情天道貴質也故配之以祖烈人情尚文也故侑之以禘宮朕追憲稽章緝熙大事昭明寅畏而精意達慈祥悌順而多祐臻申錫命書褒進右弼某明國家之體通道德之原論議而據於經維時儒者之望彌縫而藏其用有古大臣之風順民所祈躋時至治屬崇嚴於宗祀實重正於鉅儀四海莫不格歡心百工莫不有嘉德是以錫爾以上朕之賦衍爾以真戶之封以慰民瞻以敷邦渙於戲專饗獨美其福益漢文之所羞同寅協恭於表亦舜官之所尚往膺異數茂輯元勳

宋朝大詔令集卷第六十三

宰相十三

進官加恩別使五

呂大防加恩制 元祐四年明堂

門下昔吾祖宗草五代之遺復三王之舊皇祐之盛始寓總章於外
朝元豐之隆乃嚴上帝之定位厥有成憲敷遺後人朕因而循之罔
有失墜乃辛巳之吉躬被冕服祇率群工禮成不違神貺昭答誕降
多福均被在廷太中大夫尚書左僕射兼門下侍郎上柱國汲郡開
國公食邑二千九百戶食實封六百戶呂大防篤實而文寬厚而慄
在英祖時納忠不忘為名御史在神考時宣力不懈為賢守臣逮茲
續承即與丞弼既全付之鈞輔遂能任我棟梁正顏色而誠意宣出
詞氣而忠邪辯左右三載咸又四方民無煩苛危率舊職稼穡茂遂

神人燕安俾我歲事告成舊章不墜雖荷帝社時維乃功宜因賜胙之思遂有違律之典增大國邑申衍食封時爾茂勲勸我多士於戲公爾忘私非獨得君亦以獲佑於帝寬而有制非獨善始亦以克要厥終及茲休成同底至邁可特授依前大中大夫守尚書左僕射兼門下侍郎加食邑一千戶食實封四百戶勲封如故

呂大防轉官制

元祐三年三月丙子實錄成

朕蒙先帝之休荷神器之重奉若堯憲救寧邦家懷聖烈於無窮託信編於不朽曩擇縉紳之士咸施松檟之能領其宏綱付在元宰實總研覃之職久輸宿夜之勤已奏成書宜錫寵數乃消穀旦敷告治廷大中大夫尚書左僕射兼門下侍郎呂大防秉心忠醇蹈道淵粹以經國之用謨謀於百度以周物之智緬熙於萬源禮樂中和既洽大儒之効詞章溫麗自兼良史之才表率群英纂修鉅典具寫對天

之偉業載揚垂世之鴻名堅如金石之傳炳若丹青之著究微旨於五例流善譽於三長房喬上祖宗之書固無遺美張說典文學之任雅同高風是用進陟崇階之榮增隆封邑之賜嗚呼行爵出祿以敦勸於在廷褒德顯功蓋稽叅於故實膺此光渥佳其欽哉可特授右正議大夫依前守尚書左僕射兼門下侍郎加食邑七百戶食實封三百戶餘如故

右僕射呂大防進官制

元祐七年六月辛酉

惟人主御民之道憲天為公惟大臣體國之誠與上同德眷時英宰久輔本朝用疇宣力之勞懋服保庸之寵乃蠲吉日以告大廷右正議大夫守尚書左僕射兼門下侍郎上柱國汲郡開國公食邑四千六百戶食實封一千三百戶呂大防敦裕有容開明無滯行金君子之正學造聖人之微時起諸生之間早推真相之器不因人進自結

主知出入逮乎四朝險夷更而一節威懷雍部恩諭屬城召列禁林
訓詞得深厚之體進專選部銓綜有澄清之風擢登輔廷超冠宰席
肅然方恪聳四海之儀形蹈厥中庸諧萬事之綱紀靖謀謐清馴致
安佚廷議取平擬至正而不撓國鈞倚重徇大公而獨持偉望彌尊
僉言允穆是用褒嘉成德顯修茂功躡進朝階之崇增華接路之重
賦之多邑行以真封併示恩章豐明異路於戲予達汝弼益惟盡道
之心君明臣良終處俱賢之譽周思厥志永孚於休可特授右光祿
大夫依前守尚書左僕射兼門下侍郎加食邑七百戶食實封三百
戶餘如故主者施行

章惇加恩制

紹興二年九月

門下朕消選休辰稱秩元祀我將我享內盡靈承之心有壬有林具
輸顯助之力眷惟一相祇率群工揚于大廷申以休命左正議大夫

守尚書左僕射兼門下侍郎上柱國豫章郡開國公食邑四千加百戶食實封一千一百戶章惇器博而用遠寔茂而聲宏尊其所聞而不疑載之行事而可紀佑我烈考有社稷之茂勲毗予冲人以廟堂之鯁議荐膺圖任之寵升冠弼階之隆民言維口國是以定屬脩咸於百禮方大賚於萬邦申衍食封式蕃恩數於戲咸有一德伊尹所以致格天之功罔不同心傳說所以盡康民之道爾勵朕相予維汝嘉用奉若于先王終有辨於永世可

建西安用併諸路進築宰執轉官詔

元祐二年五月辛巳

脩建西安州併諸路進築要害城砦經直相通悉已工畢經營指畫誠賴柄臣夙夜勤勞以輔不逮致茲全利永固邊方章惇可除金紫光祿大夫曾布轉三官許將蔡卞黃履各轉兩官

章惇金紫光祿大夫加恩制

元祐二年五月乙丑

嗣先人宅丕后宣祇紹於慶基附百姓撫四夷寔仰成於良弼於赫上帝眷予元臣具殫夙夜之勤其下褒嘉之典敝自朕志揚於王庭左正議大夫守尚書左僕射兼門下侍郎上柱國豫章郡開國公食邑六千四百戶食實封一千九百戶章惇業亮天工道熙帝載訏謨迪哲烈文孔昭致遠有王佐之才任重得大臣之體擢自文考登翼天朝密協贊於睿謨寔導揚於末命建議定策力挫姦臣之謀扶顛持危終安神器之重功爛竹帛名光鼎彝遠予親政之初首寘秉鈞之任修起法度振張維綱屬黠羌之弗庭資長畫以馭遠內有論道經邦之寔外有開疆復宇之休列障相望道路無壅爰及叩關之請坐臻偃革之期疇成効於一時進文階於五等爰田真食並衍本封出於異恩靡有前比於戲克無疆惟恤則亦無疆惟休建無窮之基斯有無窮之聞共熙庶績式靖四方底於丕平昭我先烈可特授

金紫光祿大夫依前守尚書左僕射兼門下侍郎加食邑七百戶食實封三百戶

左僕射章惇轉特進申國公制

元符三年五月二十一日戊子

門下朕遭家不造罹國大憂念投艱於朕身用端命於上帝惟時元輔祐我先王播告治朝誕揚休命具官章惇弼亮三世勸勞百為上以贊乎天工下以定乎國是廟堂經議操守一心惟懼深籌決勝千里當昔受遺之際綏定我家遽居述事之時克篤先烈茲繼猶於泮渙方宏濟於艱難申國異恩錫位特進陪教邑采加進國封於戚后德惟臣臣良惟聖爾其立政立事勿用非謀非異尚遠乃猷克祗厥辟則予一人以懌惟爾永世有辭可特授特進依前尚書左僕射進封申國公

右僕射韓忠彥轉右光祿大夫制

元符三年九月泰陵復土

門下朕嗣宅丕后惟君萬邦賴弼直於幾康以繼猶於洋渙送終為
大獲考方宗之陵宗事不忘克祔顧成之廟用猷告於多士肆申命
於寵章具官某徽柔懿和啟大明裕智周天下之務學造古人之源
民言惟嘉世濟其美自我神考述除從班肆予沖人延登宰府緝熙
帝載勤勞王家方宏濟於多艱已克襄於大事考循彝典敷錫命書
增衍戶封迨躋位序以祚爾祉以揚王休於戲惟爾前人佑我烈祖
同底於道克成厥功其尚既於乃心以克綏於令德父子相繼克紹
緇衣之宜君臣同心永被袞職之闕徃祇朕命其遠乃猷可

韓忠彥加恩制

建中靖國元年郊祀

門下朕奉先思孝事神克艱當一陽來復之辰講三歲親祠之典舉
鬯清廟告七世以致其嚴燭紫紫壇禮昊天而盡其志嘉與士庶共
綏福休矧惟家司寔總祀事誕揚大號敷告外庭具官某德虔宏深

性資醇厚儀刑中外靜重足以鎮浮掌握樞機謀謨足以經遠比由
次輔擢正元台時惟先正之臣自任天下之重予方訪落汝則相陟
降保明之休予即清宮汝則有肅恭顯相之効均頒靈貺增衍食封
於戲燕及皇天既賴克昌之業率時昭考更資善繼之圖爾交修予
寧煩多訓可特授依前光祿大夫守尚書左僕射兼門下侍郎加食
邑一千戶食實封四百戶勲封如故

曾布加恩制

同上

門下朕仰憲聰明俯臻寧一嗣先人宅丕后懷寅畏以保邦有嘉德
無違心欽馨香而祀帝精恍昭假貺幽蒙天隆旱麓之基民被蓼
蕭之澤相維右宰申以徽章具官某寔大而深宏氣剛而識遠幾深
足以亮采端慤足以秉成體重股肱望隆柱石貳中臺之令四方之
若否具明夫嚴廊之謨百辟之從違是式逮欽崇而藏事賴肅侃以

贊儀清廟燭烝禋將竭膺敷之助紫駭陟配顯相儼雖肅之容樂繹
純而奏和禮嚴辨而致恪天宇昭泰神光燭臨既膺蕃羨之祥宜懋
烈文之寵是用加田真食拓并大封爾陪朕祠朕錫爾祉於戲丕靈
承帝命永綏泮渙之圖迪簡在王庭益大贊相之業往欽眷賚克紹
謀猷可特授依前左銀青光祿大夫守尚書右僕射兼中書侍郎加
食邑一千戶食實封四百戶勳封如故

宋朝大詔令集卷第六十四

宰相十四

拜官加恩別使六

蔡京進左銀青光祿大夫依前左相制崇寧

門下位官宰司總儀刑於百弼功昭遠圖置鎮撫於四夷若時帷幄之謀克復河湟之境不有褒典曷彰顯庸敕告治廷誕揚休命右光祿大夫守尚書左僕射兼門下侍郎上柱國南陽郡開國公食邑四千一百戶食實封九百戶蔡京惇大而敏達高明而裕和自予親攬於萬微乃始延登於三事凡有所建咸底於成四民樂業而遂生五緯循軌而靡忒遠此捷奏尤為膚功蓋彼遡川寔我故壤永泰拓土亟垂希世之勲巨姦誤朝敢行戲國之計列堡既棄峙糧悉捐民思漢而自深地非羗之宜有歸如赴壑先料勝於萬全易若建瓴果收

功於一舉朕以紹復為志專在倚毗卿於精審之才動中機會陟文階之三等示嘉績於萬方申衍爰田陪敦真食併錫茲寵用以旌賢於戲我武惟揚既資於多算而戎即叙尚賴於壯猷自昔君臣會遇之難於今天人叶應之著時哉勿失展也大成益邁遠圖共承先志可特授左銀青光祿大夫依前守尚書左僕射兼門下侍郎加食邑七百戶食實封三百戶勲封如故

何執中進司空制

政和二年
哲錄成

門下朕奉循聖緒邁駿丕圖永維四德之作求敢替友恭之大義勸諸信史對揚天地之休總其宏綱永賴鈞衡之重奏篇來上寵冊誡敷協以剛辰告於列位特進尚書左僕射兼門下侍郎上柱國南陽郡開國公食邑四千四百戶食實封一千三百戶何執中器面敦裕履尚粹夷造幾有成務之才居簡得鎮時之望尊德樂道是惟借學

之臣經體贊元克懋交修之志廸庶明而勵翼躬一德以周旋穆穆
迺衡惓惓盡節弼違獻可既勤人告之辰猷比事屬辭脩載無前之
偉績淵然謨訓炳若丹青豈專筆削之能式契紹承之美是用參稽
勞烈特峻官班陟宏父之崇資渙公台之備物優加并賦申衍真租
併示恩榮益昭仕遇於戲書存二典唐虞遂冠於百王位正三槐丞
輔孰先於一相往欽異渥永格丕平可特授司空依前尚書左僕射
兼門下侍郎加食邑七百戶食實封三百戶勲封如故仍令所司擇
日脩禮冊命

蔡京加恩制

明堂禮成

門下朕若昔大猷教民美報誕舉宗祈之典燕及皇天實惟論道之
臣式是百辟勵肅雖而顯相致福祿以來崇宜有襲章用時多頌太
師魯國公食邑一萬四千九百戶食實封五千二百戶蔡京高明而

方重博大而宏深協千載之亨期維持國是膺兩朝之異眷敷遺朕躬訖登三事之崇迨此十年之久有如傳說紹乃辟於先王端若周公爲前人之成烈險夷一致而無累酬酢萬變而不窮琴瑟載張振和聲於舊律斧斤罔缺發游刃於新例興禮樂於百年布膠庠乎四海貨通物阜財足政成爰荐集於歲祥方靈承於祀事濟濟多士罔不祇師言穆穆迓衡惟助成王德大正緝熙之典尤殫夙夜之勤肆申衍於食封以共承於神慮於戲惟聖為能譽帝莫重精裡非賢罔與守邦宜膺休享往惟不怠永洽丕平

何執中進太傅改太宰兼門下侍郎加恩制

門下五帝莫盛於堯在則天而體道三王莫高於禹爰制詔以告功蘊衆妙以含章冠多祥而稱瑞朕丕膺眷祐登濟隆平於昭錫羨之祥翕受非常之貺端朝凝命既誕舉於彌文渙號疇庸用敷宣於顯

冊具官何執中才周而用博資厚而履祥訂謨足以經遠猷敏識足以裁庶務感會潛藩之眷雍容禁索之華坐執銓衡著激濁揚清之美入陪帷幄有進思退補之忠既選衆以登庸彌竭誠而勵相陰陽叙順法度修明靡忘小物之勤尤盡大臣之節薰然協氣式荐降於嘉生訂是珍符彌有資於顯助矧在表儀之地方新訓迪之原總名實以話功期予于治辦公孤而序職惟古之師超陞亞傳之崇肇正宰司之重爰田衍賦真食陪封用併修於神休益共釐於邦采於戲紹天明而即命式克欽承遵世德以作求昭茲來訓尚謹時幾之教永孚福祿之同罔俾前人有斯專美可時授少傅改太宰兼門下侍郎加食邑食實封勲封如故

何執中進少保依前太宰制

朕垂精勵志膺天地並貺之休度律均鍾作君臣相悅之樂式燕以

衍既和且平豈惟飾喜以滌情蓋以移風而善俗仍眷將明之助式
隆褒序之恩爰詔大廷誕揚顯冊具官何執中靖莊而迪哲方重而
秉彛篤周畏之小心經綸之大略雍容道義是惟舊學之良密勿
謀謨蔚有嘉言之益若股肱而成一體若舟楫之濟巨川用底大寧
允資神告朕稽叅古訓協正新音增徵角之招備瓠土之器播諸遠
邇華彼淫哇庶尹允諧萬邦維慶欽懋賢勞之績孰先宣亮之臣其
陞冠於三孤仍陪敦於多賦併昭禮遇式聳儀刑於戲勸以九歌方
迓太平之盛佑于一德尚肩勿替之誠往綏厥猷以對光命可特授
少師依前太宰兼門下侍郎加食邑一千戶食實封三百戶勲封如
故

何執中加恩制

政和
郊祀

門下朕祇若舊章荐稱吉禮類于上帝於昭報本之誠推以配天載

嚴尊祖之義眷時元宰為世真儒寔率籲於庶工用協成於元祀宜
頒明命以罷殊勲少師太宰兼門下侍郎南陽郡開國公食邑七千
四百戶食實封二千二百戶何執中道直以方器深而博識際天人
之精稷學窮德義之淵源陪輔潛藩徊翔法從剛正不撓凜乎廊廟
之才敦大有容渾然金玉之質式符民望登東園成朝無間言事底
成績登彼二公之任魁於三少之崇弼予一人宅茲百揆逮獲精裡
之荅尤加顯相之勞歸昨云初均恩可後是用加畀并封之實并疇
邑賦之多以小龍光以蕃物采於戲皇受其福敢專饗于神釐永孚
于休其共熙於帝載往膺敕冊益茂遠猷可

鄭居中進少傅制

政和八年
七月西捷

天子之宰通四海允兼治外之方仁人之兵同一心斯有告成之効
眷時台揆翊我邦國協宣廟筭之良克致師于之勝師頒渙冊昭荅

顯庸具官某學博而行醇智周而慮遠之才之美有姒公望道之思
至大至剛得孟軻養氣之義出陪熙運越軌鴻樞屢罄謀猷之嘉具
多文武之憲頃進持於魁柄俾欽亮於天工經德不回古訓是式若
金用汝礪言每沃於朕心作宣乃肯堂事必揚於先烈百度攸飾三
階以平惟彼夏戎自干天討運籌決勝本茲帷幄之中惇德允元宜
爾蠻夷之服共恢遠略遂珍遠虞已申無敵之威爰有非常之寵貳
公洪化特陞亞傅之崇舍爵策勲更詔多田之益以隆體貌以重鈞
衡於戲樊侯以明哲保身佐宣王之常武張仲以孝友處內濟吉甫
之膚公尚懋交修永毗予治可

余深進少保制政和八年四月西提

門下宰相親內而撫外莫先馭遠之國王兵無戰而有征尤賴處中
之助粵惟次輔泰秉化工爰茲多算之奇遂奏膚公之敏我有大號

播於廣廷具官某材備而氣完德全而行饒正色不撓同昇公率下
之風多聞是求協傳說師古之訓周旋三省出納萬機具殫夙夜之
忠每共時幾之戒逮延登於揆席益丕享於朕心懋亮采之誠克篤
先猷之治廣籲俊之路允為多士之歸代工無曠於庶官報政不踰
於期月有迪彝教方隆德於國人能用真儒宜無敵於天下曾是必
亡之口口口匪茹之誅師克在和莫予敢侮謀合其適迄用有成式
昭繼伐之思時渙策勳之渥峻升亞保聯孤棘於外朝申行爰田胙
公主於方國褒加徽數庸示眷懷於戲元老之克壯其猷實邁南征
之雅三后之同底於道乃賓推轂之人尚食明謨以揚休命可

余深加恩制

王者之兵若時雨茲大悅於民心朝廷之相用真儒宜無敵於天下
眷時元宰翊我不圖助成廟畧之彊坐暢國威之遠肆頒顯冊丕告

群工具官某器博而用周量閔而行飭學探聖深之淵妙識泰易繫之幾微經德不回素堅君子之守正色率下共推王佐之才擢預政機治更歲紀乃延登於接路旋進處於眾司舉萬物各得其宜無一夫不被其澤致蠻夷之服既聞永進而允元處惟惺之中兼倚運籌而決勝屬夏戎之匪茹整王旅以徂征弗迓克奔茲大申於天討無思不服將永靖於邊虞廟社告成神人滋喜慮無失策時先軍勝之褒明不踰勲首作弼諧之勸用加陪於井賦仍衍實於圭臬以峻嚴據以華袞職於戲昆夷惟其喙矣既昭震疊之威周公方且膺之更資填撫之效往欽時命茲罄嘉猷可

蔡京加恩制宣和元年冬郊

門下聖王成民而致力於神乃消休於元祀昊天其子而式序在位用均祝於宗工朕荐卜康年肇稱吉禮裸將在廟薦束蓬稊米之和

褒封中壇奉四圭卽璧之潔染登黻組之躬藉幣用鞠衣之獻功大
饒微而羽鶴儀欽紫燎而祥光燭方龐恩之數錫賡元老之同寅咨
爾百執之臣聽予一人之訓大師魯國公蔡京忠孚金石智兆蒼龜
文考佑我後人遺立政造事之傑上帝眷予良弼應尊主庇民之求
逢辰千一之隆圖治三五之上經邦論道燮元化之陰陽開德宣符
平泰階之風雨禮樂明備乾坤宴安爵齒德之達尊謀面用而不訓
七百里國之封曲阜勲分已邁於姬公二十四考之較中書福祿將
逾於郭令茲迄成禋之盛有嚴致使之勤詔盟府以疇庸徹轅田而
加賦式殊體貌併厚恩私於戲遂物之宜而寒暑時既授百神之職
勅天之命而股肱喜更欣庶事之康無兢惟人永錫難老可依前魯
國公加食邑一千戶食實封四百戶

余深加恩制 同上

門下上帝儲祉以慶成茲迪先禋之典宰相代天而理物允資寅亮之功朕祗紹先猷聿修元祀眷時上宰實贊鉅儀迄授典之告虔賴徽章而錫寵肆颺詔綽用亶廷紳少保太宰兼門下侍郎余深德厚而器竑才高而識遠正色率下渾然璞玉之純直道事君凜若嚴霜之潔論議早聞於憲府夙猷彌奮於中臺勤勞百為夷險一致獎邦由哲旋陞機席之崇經體贊元遂正鼎司之重朝夕納誨輔德左右厥辟宅師御事有恭俾予從欲雨暘時而百穀茂妙恭變理之圖默陟公而庶事康克底績熙之績比被觚壇之薦有嘉績佩之容方拜昨以均禧肆疏恩而孚渙衍之真賦錫以名邦併示龍光益蕃物采於戲大報天而主日適觀釐事之成使宅揆而惠疇更賴碩膚之敬尚迪有祿永孚于休可依前官職進封衛國公加食邑一千戶食實封四百戶

王黼加恩制同上

門下迎日之至以報天斯重齊民之薦餒神之餘而觀政用同社稷之承朕習用歲祥躬承帝類瑞穰穰而山委昭德產之精微日穆穆而金波歟雲陰之解駁禮儀既脩慶賜遂行惟英衮之協恭寶衆覽之丕式宣乎有訓欽德無諱特進少宰兼中書侍郎兼充神霄玉清萬壽宮使魏郡開國公食邑四千戶食實封一千一百戶王黼學貫道淵識幾聖蘊脩衆美而不器兼優孔氏之四科蹈大猷而有常并載率陶之九德凜若經邦之傑協於夢帝之休自進陟于宰司益恢施於賢業輔贊彌縫臧諸用殫股肱心膂之誠推正調娛中於和格天地陰陽之應萬物由儀而茂遂百寮宿道而靖恭迄有成功登茲盛祀用詔祖朕之益以時使指之庸典冊增華眷懷深渥於戲天無親惟德是輔聿蕃並受之釐后克聖不命其承永迪丕平之功惟恭

御事以覺斯民可特授依前官職加食邑一千戶食實封四百戶

王黼進少傅加恩制宣和三年九月

門下明主之論一相恢贊元經體之謀大臣之慮四方茂和衆安民之畧比將師律往靖寇攘蕩平雖自於武功鎮撫實繫於廟筭載念策勲之重時先宅揆之榮誕告治廷賈乎群辟少保太宰兼門下侍郎兼充神霄玉清萬壽宮使魏郡開國公食邑五千七百戶食實封一十八百戶王黼嚴瞻偉望帝眷英資器凝璫玉之鉢識妙著龜之信言成文而動成德體君子之躬行仁也柔而義也剛凜古人之節守蚤預政機之要延登宰席之嚴遂萬物而遂四時載懋格天之業釐百工而熙庶績允諧亮采之謨辨邪正於常情爽侮之初肅紀綱於流弊叢清之際人識熙豐之舊世揚文武之休道德成乎安強已觀靈臺之偃伯政刑脩於閒暇豈復潢池之弄兵夫何嘯聚之徒尚志包

藏之惠肆適戎未遐聖皇威雖師徒行謀自有必擒之計而廟堂消
患尤資常勝之圖未踰再藉之淹果上執俘之奏全大功而安四極
尤高奠枕之勲褒有德以懷萬邦敢後司盟之典陞華亞傳衍食真
儒增光孤株之聯益侈衮衣之寵於戲澤潞之策未定汝惟善斷於
群疑淮夷之績既平汝實誕昭於文德若予碩輔克邁前文尚殫寅
亮之恩永弼隆昌之運可特授少傅依前太宰兼門下侍郎兼充神
霄玉清萬壽宮使加食邑一千戶食實封三百戶

王輔遷少師加恩制

宣和四年七月
哲宗實錄成

門下求多聞而建事莫先信史之傳宅百揆以惠時式重宏綱之宰
仰泰陵之遺緒開紹聖之洪模盛德休功亶著丕天之烈直文核事
益資實錄之良賧乃弼臣總或鉅典成書來上寵數惟公少傅太宰
兼門下侍郎兼充神霄玉清萬壽宮使魏郡開國公食邑六千七百

戶食實封二千一百戶王黼碩大而閎深粹明而博達剛柔不倚行
居九德之成才學兼全文擅三長之譽久陟禁林之密峻躋宰路之
嚴自登冠於冢司益兼持於國是異倫皇極叅裁庶績之和一日萬
幾助酌群情之當邦畿彌固民俗永綏固石室之細書止台符而蒞
象稽哲廟九年之恭默初政赫新紹寧人七閩之經營詒謀渙備雖
衷集以周子辰紀而改為甫閱于歲時事別源流允矣八書之目世
釐先後昭哉二典之文循雅頌之舊章發春秋之新意評高玉潤褒
加重於衮衣化妙洪鈞權增隆于相筆嘉論輯之攸就諒貫穿之惟
勤肅御使朝躬覽簡編之富祕藏寶構永遵謨訓之成宜錫異恩以
旌殊效叙亞師而授秩啟成國以疏封併衍圭臆用光禮貌於戲文
武之政布在方冊獲觀善美之規孝弟之至通於神明敢怠繼承之
念尚期賢佐允迪皇猷丕宣大業之昌永邇無為之化可特授少師

餘如故加食邑一千戶食實封三百戶進封崇國公

宋朝大詔令集卷第六十四

宋朝大詔令集卷第六十五

宰相十五

罷免一

范質等罷相制 乾德二年

開物成務既伸佐國之功以逸代勞宜與優賢之典其有位忝四輔
功著累朝始終克茂於嘉猷進退敢忘于異禮司徒兼侍中昭文館
大學士范質貞規鎮俗清德服人司空兼門下侍郎平章事監修國
史王溥經緯全才播紳雅望樞密使右僕射兼中書侍郎平章事集
賢殿大學士魏仁浦素通儒術兼練武經而偕挺金石之淳誠郭江
湖之偉量夙夜匪懈知無不為佐予開創之基賴爾緝熙之績維位
隆三事所宜勉輔于冲人而日有萬幾安可久煩于舊德俾令就第
用解持衡升一品于春宮總六卿于會府永保崇高之秩用光瑚載

之勲質可太子太傅溥可太子太保仁浦可依前守尚書左僕射

趙普罷相授使相制

開寶元年八月甲辰

代天治物厥功既成仗鉞臨戎新委元重雖弼諧而是賴且勞逸以
宜均睦惟孟津介於河洛索為真壤況乃近藩爰命台神俾分閫寄
尚書左僕射門下侍郎平章事昭文館大學士趙普昔在霸府實為
元勲治當草昧之初首贊經綸之業千載起興王之運十年居調鼎
之司帷幄伸謀股肱宣力變和萬景已施濟物之功鎮撫三城適表
藩垣之實師壇受任相印兼榮永隆屏翰之權更勵始終之節可特
授檢校太傅同中書門下平章事便持節孟州諸軍事孟州刺史充
河陽三城節度孟懷等州觀察處置管內河堤等使仍改賜推忠佐
運同德明戴功臣

盧多遜罷相資授兵部尚書制

太平興國七年四月戊辰

調梅作礪中外之所瞻加滕陞淵古今之攸誠矧於輔相之任必全
進退之宜中書侍郎兼兵部尚書同平章事范陽郡公盧多遜早中
科名亟更臺閣久徊翔于近列常際會於先朝擢預中樞俾參庶政
洎予臨御荐正台衡補衮之効茂聞由徑之蹤盡露節虧忠蓋道有
依違尚塵廊廟之榮曷厭播紳之議爰推念舊用示遷瑕俾領夏官
以奉朝請用全終始之分以彰廣大之恩可責授兵部尚書

沈倫罷相責授工部尚書制

太平興國七年
四月庚辰

左僕射兼門下侍郎平章事監脩國史沈倫頃自諸生幸逢興運亟
登廟口遂踐司閤閱無聞際會斯極洎予臨御尤所倚毗七年于
茲恩寵備至所宜盡心竭慮知無不為使中外和平苛慝不作此宰
之相之任也昨盧多遜包藏逆節結構異端豈無奸邪之謀見于舉
指之際汝則與之同列積有日時安然坐觀曾不先覺矧其醜跡上

漬朝經離我友于之親傷我寬仁之德貪榮竊位于汝安乎雖復謝
病引年拜章上綬儻更優其爵秩何以肅于播紳非我無恩益全大
體六卿之任位望特隆深屈憲章粗申獎勵可資授工部尚書其子
都官郎中繼宗本由父蔭不宜更在朝行可落班簿

趙普罷相授太尉兼侍中武勝軍節度使制

太平興國八年十月己酉

入總國政寶冠三司之崇出分閭寄事當二老之任所以推恩禮于
輔弼仰倚注于勳賢斯為大猷豈敢虛受開府儀同三司司徒兼侍
中昭文館大學士梁國公趙普挺鍾間極富稟誠明草昧之初締創
之功克著巖廊之上啟沃之効居多朕時咨老成叅用舊德再授鹽
梅之寄用師藥石之言彌縫之績既彰調燮之勤斯著煩我著艾職
茲樞衡授以蕃宣均其勞逸用加掌武之秩以增衛社之雄大啟南
陽夾輔王室可特授太尉兼侍中行鄧州刺史武勝軍節度使

宋琪罷相歸班制

雍熙二年十月
二月丙辰

王者欽若大猷允釐庶政必稽台輔以張化源上所以燮和陰陽下
所以康濟黎獻惟公是務與衆共之或時望有虧物情未允進退之
際公議在焉門下侍郎兼刑部尚書同平章事宋琪早以時材嘗依
藩邸荐更歲月久效官常泊朕纘承載懷求舊攀附鱗翼騰躍風雲
擢於會府之中處以公台之任而識非廣大望口具瞻曾無端慎之
稱但有詖諧之誚朝章政典無所發明百度彛倫如何欽式豈可以
承倚毗之重當憂責之任哉宜以秋卿俾還相印退之以禮不謂無
恩勉務欽承自求安逸可刑部尚書

李昉罷相除左僕射制

端拱元年
二月庚子

端拱崇資文昌右相蓋非賢而不授諒出綽以為公告示具僚舉茲
明命中書侍郎兼工部尚書同中書門下平章事李昉嚴廊舊德文

學名儒踐臺閣之通班素高問望處鈞衡之大任久展謀猷謙和秉
君子之風純懿善古人之美今者輟從三事提彼六卿董聲喉舌之
官載光北斗領袖搢紳之列首冠南宮用咨鎮俗之清規式表尊賢
之茂典英數適尊于表著矜懷別視于股肱佩服渥恩優游名器恭
踐厥位惟往欽哉可尚書左僕射

趙普罷相除兼中書令河南尹制

淳化元年正月戊子

帶河之誓蕭相首於群臣分陝之寄周公冠于二老矧乃公宣締構
績著巖廊懇辭金鉉之崇願遂安車之志不加殊禮曷報茂勲開府
儀同三司守太保兼侍中昭文館大學士上柱國許國公趙普宇
量淵深風規震肅翊戴先帝實有佐命之勳弼諧沖人益見匪躬之
節而自再持將成三冠鼎司駿假宣猷寅恭協德小大之務知無不
為夙夜之勤寢以成疾聿遵賜告之典懇陳避位之言喻之再三終

不可奪鞏洛之地成周舊壤王畿之廣實切於保釐京邑之重允瞻於表則乃兼八柄之秩往撫千里之邦勉荷罷章貳資卧理可依前守太保兼中書令行河南尹兼功德使兼西京留守

呂蒙正罷相除吏部尚書制

淳化二年九月己亥

宰相之任所以代天工統人物內以平章百姓外以鎮撫四夷華夏具瞻安危攸繫其有訂謨獻納茂聞苦口之言朋黨比周深失蒼生之望宜行策免以肅朝經光祿大夫中書侍郎兼戶部尚書同中書門下平章事監脩國史上柱國東平郡公呂蒙正擢口口平累遷清要驟登三事于茲九年所宜盡瘁公家屬精庶政任當補衮而曷嘗有聞知在挈餅而曾無所守但務引援于親暱不思澄汰于流品竊祿偷安莫斯為甚匿瑕藏垢誠合自知儻更倚於弼諧是自貽於蒙蔽政之有闕悔不可追用全進退之宜貳表始終之分尚居會府俾

領天官久謂優隆勿忘循省可吏部尚書

張齊賢罷相除尚書左丞制

淳化四年六月丙寅

居元首者寔賴于股肱濟巨川者必資于舟楫其有自升廊廟載歷
星霜粗彰夙夜之勤宜全進退之禮吏部侍郎同平章事張齊賢伏
膺儒術策名清塗久參宥密之司嘗委折衝之寄每好談于方略頗
自許與功名驟遷鈞軸之權尋正燮調之任疇咨後德輔佐眇躬而
力不待心名浮于實况多居於假告特宜解於鈞衡俾還左轄之崇
資勉舉南宮之故事可尚書左丞

李昉罷相制

淳化四年十月辛未

變和陰陽輔相天地秉至公而貞百度熙庶績而形四方宰相之任也
苟或依違在任啟沃無聞雖居廊廟之崇莫著彌綸之効宜數朝旨
用罷昉司金紫光祿大夫守尚書右僕射兼中書侍郎同中書門

下平章事監修國史上柱國隴西郡公李昉夙仕昌辰荐升華冠朕嗣
膺丕構渴見老成驟遷侍從之班再荷鹽梅之寄所宜翊宣帝載啟
迪皇猷竭智慮以代天工體誠明而操國柄歲時屢換績用缺然朝
廷損益之彛章社稷安危之大計時咨閔決屬在廟堂汝自處機衡
曾無規畫雍化原而斯久孤物望以何深朕褰服臨民虛心待理儻
口口要務尚委於具臣則蒼昊景靈懼貽於深譴宜免公台之重
庶全進退之私俾長中臺尚為優渥可依前尚書右僕射罷知政事

呂蒙正罷相除右僕射制

至道元年
四月癸未

邦國政治蓋出于中書朝廷紀綱盡在於會府矧乃端揆之任聿居
師長之崇苟非台鉉之賢曷慰播紳之望光祿大夫吏部尚書同中
書門下平章事上柱國東平郡公呂蒙正挺身英器符合昌期自光
夢卜之求遂荷鹽梅之寄謨明匪懈亮直不渝爰自天官再持政柄

洎和鼎寔時惟老成朕欽若丕圖建用皇極雖彌綸大體固未協于
康哉而屬翊小心亦備觀於勤止頗藉隆平之望宜均勞逸之功長
是金臺式茲百辟地高務簡足以養順勉服寵光往踐乃位可尚書
右僕射

張齊賢罷相歸班制

咸平三年十
一月丙申

昨以陽律肇升會朝展禮筮鋪備樂冠屨在庭不意宰司忽虧儀範
用明常憲誕告具察光祿大夫行門下侍郎兼兵部尚書同中書門
下平章事上柱國清源郡開國公張齊賢頃忤先帝亟居外藩洎朕
纂承復膺委任位崇喉舌職在鈞衡居三事之崇享萬鍾之厚屬當
大禮表率周行而乃酣鶯孟觴敬傾冠弁潰茲朝著悖我威儀合宜
典刑用糾違慢念久更於顯用尚曲示於寬恩期乃省躬知予宥過
可依前行尚書兵部歸班

向敏中罷相歸班制

咸平五年十月丁亥

廟堂之上輔弼之臣實代天工式隆政本苟徇私踰矩罔上圖安其在公朝曷副食屬光祿大夫尚書兵部侍郎同中書門下平章事集賢殿大學士上柱國河南郡開國公向敏中逮事先帝當列中樞洎朕纂承遂正台宰翼贊之功未著廉潔之操茂聞喻利居多敗名無耻始營故相之第終興蔑婦之詞對朕食言為臣自昧從宜罷免用肅群倫可戶部尚書居班

呂蒙正罷相除太子太師萊國公加恩制

咸平六年九月甲辰

國有承弼時惟股肱入既賴於嘉猷退亦全其養素特進守司空兼門下侍郎同中書門下平章事昭文館大學士上柱國東平郡開國公呂蒙正文雅之行簪中所推出入兩朝踐揚三事經百度之繁會集九功之惟和夙夜致勤腠理生疾願辭銜石屢削疏章重違至懷

式降優命可太子太師進封萊國公加食邑七百戶食實封三百戶
改賜功臣

寇準罷相除刑部尚書制

景德三年二月戊戌

弼諧之任體貌宜隆其有踐歷台階貿遷歲律彌綸事典盡瘁夙宵
俾從進退之宜用保初終之分聿頒明命誕告具僚光祿大夫行中
書侍郎兼工部尚書同中書門下平章事集賢殿大學士上柱國上
谷郡開國公寇準蔚有壯圖出逢昌運器幹標於國棟符采冠於時
髦向以先帝舊臣虛懷厚遇擢進會府遽列近司左右朕躬緝熙帝
載眷言機務不欲重煩解黃閣之劇權正秋卿之峻秩荷茲寵命式
保令猷可刑部尚書改賜功臣餘如故

王旦罷相拜太尉制

天禧元年七月丁巳

旌賢尚德邦國之彝章圖舊念功君臣之厚契在出綸而加等表注

意以攸深開府儀同三司守太保兼門下侍郎同中書門下平章事
上柱國太原郡開國公王旦淳固守和宣慈迪哲本於冲猷經以懿
文碩德首於民彝徽言彰乎國論自付魁柄冠於宰庭著論思亮采
之謀輔端拱財成之化得魏相提領之要敦曹叅清淨之規盡瘁所
由感疾甚篤囊封屢上滙懇辭榮錄是峻以徽章簡其趨謁雖深眷
倚彌執謙冲遂輟茂恩俾從素志庶諧偃息漸保和平而露奏繼陳
忠懷愈懇載念萬機之重務久煩一德之元臣特厚褒崇用均勞逸
上公峻秩真館清祠俾遂養順茂臻戩福可太尉依前充玉清昭應
宮使加食邑一千戶食實封六百戶改賜功臣擇日備禮冊命

宋朝大詔令集卷第六十五